

編號 3 號

【另外一種煩愁】劉玉蕉原作

千盼萬望，阿姆應¹佢咧！

牽等新自行車，佢胸挺挺、鼻鼾鼾仔想愛一路飄轉去，阿爸知佢奈母何，細聲咄佢講：「毋識騎過，毋驚死就做你騎講。」佢鼻公摸啊，睺一下脣口老妹該臺矮佢个四輪仔自行車，「哼！」佢風神轟天，看等面前金皙皙²緊同佢攞手个自行車，想講：「大吔，乜毋係無半點好空啦！」毋過，風神過後，對自家像嘮風樣仔抽長个身體，佢還係試著已關，關到會死！

「阿伯婆，若孫仔身高超過標準，愛打全票吔！」阿婆好帶佢出門遶寮、看電影，這恁久，輒輒堵著共樣个问题，阿婆敗勢，佢乜感覺已無面子，淨加幾公分仔定定就愛使加一倍个錢，實在無道理。

「手腳輕兜仔，莫一日到暗挨著神打著佛！」阿婆唸佢、阿姆哆佢。實在冤枉，屋下就恁大仔定定，佢既經當忍耐毋敢拍球仔咧，還係不時毋係撥著東西，就係踢著凳腳，毋係挑事，嗰分人誤會講賤手賤腳，唉，頭那還痛哦！總講啊，佢手長腳長哩，

坐等，人嫌霸位；企等，人嫌礙眼就著吔啦！

「生來恁高恁大咧，毋加減搵手兜仔咩！」看，阿姆个箭又射過來哩啲！拜託欸，鄰舍、阿爸、阿婆哪個毋係阿腦佢乖、肯搵手？比得老妹，該斯天爭地哦！尤其係堵著大拚掃時節，阿爸个事頭，佢貌有三股一恁多，恁樣个佢，在屋下還係分人嫌到無一埕好，正經無天理。

手長腳長在屋下有恁仔个待遇，在學校有較得無？無，人講：「天塌落來有高个人撐等。」無毋著，先生講臺一企，目珠看啊去，堵堵到後排，變把戲都毋得！運動會時節，大家認為若腳較長，跳高、跳遠定著打有名，麼人知悽慘到愛先生來安慰，走相逐總看得哪，還見笑，聽過自家會徑自家無？該就係佢啦！在運動坪項跌到狗食屎，搵到大家人哈哈笑，臨尾校長賞佢運動精神獎，這補償對佢來講已實在，承蒙佢！

雖然高長大漢帶分佢一時个毋慣同煩愁，毋過，佢相信毋慣過後，佢會體會著成長个快樂。煩愁个正面係阿腦佢知人我，先生个目珠督等，佢毋敢狡怪，成績就恁樣日日進步。

¹ 應：音 in`；允諾、准許。

² 金皙皙：音 gim' xi xi；亮晶晶。

【學騎車仔】鄒瑞梅原作

在佢讀小學一年生個時節，阿爸輒常用自行車載佢去學校讀書。上崎個時節，阿爸大粒汗細粒汗踏到散氣毋上；下崎個時節，就溜一路下。路個兩片種等歸排個竹仔，還有一頭黃梔仔花¹，風吹啊過來，黃梔仔花個清香，佢到今共樣還記到清清楚楚。

佢盡好坐在後座仔，聽阿爸話天說地，阿爸不時教佢做人個道理，佢講：「大人毋講古，細人仔毋知寶。」兩子爺一路唱歌唸曲，山歌溜天，還有三字經摺弟子規也係佢坐在貨載仔頂學會個。

到佢讀三年生個時節，想愛騎自行車，就拜託阿爸教佢騎。阿爸摺自行車牽到大禾埕，過擎一枝擔竿縳在後架仔，佢講恁樣車仔橫下來個時節，佢就毋會分車仔砑著。阿爸捍等後架仔分佢坐好勢，過教佢兩隻腳踏在腳踏仔頂，大力牯一踏，車仔就行咁。佢個心肝就像「十五個吊桶打水——七上八落」當緊張呢！阿爸在邊脣同佢做膽，佢講：「『知得該孔竅，打得該鬼噉。』較細義兜仔，毋使驚，阿爸在後背同你掌等。」

¹ 黃梔仔花：音 vong^ˇ gi^ˊ e^ˋ fa^ˊ；黃梔子花。花名。茜草科，黃梔子屬。常綠灌木或小喬木，高約三公尺，花瓣六枚，氣味幽香，初開時為白色，花謝時漸轉為乳黃色。

佢當煞猛練習，全無歇睏，大禾埕緊來緊鬧熱，阿哥、阿姊、老弟、老妹還有隔壁個阿明、阿秀通棚走過來同佢加油，連阿明畜個狗仔也跔在吾車仔後背挨來挨去。恁多人在該看佢騎車仔，做毋得漏氣哦！係跌倒就盡無面子，阿明定著會去學校做報馬仔講分同學笑話佢。

為著無愛分阿明摺同學笑，佢盡拚勢練習。哈哈哈哈哈，無一點鐘久佢就曉騎哩。阿爸同佢講：「還慶哦！毋聲就毋聲，一聲就打爛盞。」阿爸個話正講出嘴，手一放，車仔就橫下來咁，正經還見笑哦！賺痛個，吾手巴掌、腳膝頭都鑊溜皮咁，還痛哦！痛到佢目汁濫汨。

大家都無笑佢，還走兼來關心佢有仰般無？阿明問佢還愛練無？加講個，「趕燒趕熱」哪有毋練個道理？阿爸看佢有增志，過一擺捍等後架仔，分佢騎上自行車，佢盡力牯踏，練到汗流脈落，這擺正經曉騎哩！佢歡喜靈天²，大大聲同阿爸講，等佢大咁，一定愛用這臺腳踏車載阿爸滿哪去寮！遠遠，看著阿爸同大家企在禾埕脣，笑到嘴弛弛仔。

² 歡喜靈天：音 fon^ˊ hi^ˋ lag^ˋ tien^ˊ；欣喜異常。